

Ўзбекистон Миллий университети Кенгаши тўғрисида Низом

Мазкур Низом Ўзбекистон Республикасининг “Таълим тўғрисида”ги (Ўзбекистон Республикаси Олий Мажлисининг Ахборотномаси, 1997 й. 9-сон, 225-модда) ва “Кадрлар тайёрлаш миллий дастури тўғрисида”ги (Ўзбекистон Республикаси Олий Мажлисининг Ахборотномаси, 1997 й. 11-12-сон, 295-модда) қонунларига ҳамда “Олий таълим тўғрисида”ги Низомга мувофиқ университет Кенгаши фаолиятини ташкил этиш тартибини белгилайди.

I. Умумий қоидалар

1. Университетнинг фаолиятига тегишли асосий масалаларни кўриб чиқиш учун ректор раислигида университет Кенгаши ташкил этилади.

2. Илмий кенгаш таркиби ректор, проректорлар, факультет деканлари, университет таркибига кирувчи мустақил ташкилот ва тармоқлар директорлари, мутахассис чиқарувчи кафедралар мудирлари, шунингдек, жамоат ташкилотлари раҳбарларидан ташкил этилади. Кенгашнинг бошқа аъзолари факультетнинг умумий мажлисида яширин овоз бериш йўли билан сайланадилар. Профессор-ўқитувчилар таркибидан Кенгашга сайланувчи аъзоларнинг сони ректорнинг буйруғи билан белгиланади. Кенгаш таркибига университетнинг муайян йўналиш муаммолари бўйича ишлаётган йирик олим ва мутахассислари ҳам киритилиши мумкин. Ваколат муддати – 5 йил.

3. Кенгаш таркиби университет ректорининг буйруғи билан тасдиқланади. Ҳар ўқув йилининг бошида, турли сабабларга кўра Кенгаш таркибидан чиққанлар ўрнига, янги аъзолар сайланади ёки низом бўйича киритилади.

II. Кенгашнинг мақсад ва вазифалари

4. Кенгашнинг мақсади – университет жамоаси сайъ-ҳаракатлари, интеллектуал салоҳияти ва бошқа барча имкониятларни Ўзбекистон Республикасининг “Таълим тўғрисида”ги ва “Кадрлар тайёрлаш миллий дастури тўғрисида”ги қонунларида белгиланган вазифаларнинг бажарилишини таъминлаш, олий таълимнинг давлат таълим стандарти талаблари даражасида мукамал билим, малака, кўникмаларга эга бўлган профессионал мутахассислар тайёрлашга йўналтиришдан иборат.

5. Университет Кенгаши:

- Кадрлар тайёрлаш миллий дастурига мувофиқ давлат таълим стандартлари, ўқув режалари ва дастурларининг қатъий бажарилишини ўрганиб чиқади ҳамда устивор масалалар бўйича тавсия ва топшириқлар белгилайди;

- факультетларнинг ўқув, илмий-тадқиқот ва маънавий-маърифий ишлари тўғрисидаги, академик лицейлар, университет қошидаги илмий жамиятларнинг фаолияти тўғрисидаги, қабул комиссиясининг қабул натижалари тўғрисидаги, шунингдек маркетинг хизматининг халқ хўжалигининг битирувчи мутахассисларга бўлган эҳтиёжи, буюртмачи ташкилотлар билан ҳамкорлик алоқалари тўғрисидаги ҳисоботларини эшитади ҳамда тегишли қарор қабул қилади;

- илмий-тадқиқот, маънавий-маърифий ишлар режалари ижроси, профессор-ўқитувчилар таркибининг малака ошириш ва қайта тайёрлаш масалаларини муҳокама қилади ҳамда тегишли қарорларни қабул қилади;

- иқтидорли талабалар сафидан ва профессор-ўқитувчилар таркибидан номзодларни тегишли жамғармалар орқали хорижий олий таълим муассасаларида стажировка ўтишга тавсия этади;

- университет иқтидорли талабалари ва стажер-тадқиқотчи-изланувчилари сафидан Ўзбекистон Республикаси Президенти Давлат стипендияси ва номли давлат стипендиялар танловида иштирок этадиган номзодларни тавсия этади;

- "Соғлом авлод учун" жамғармаси билан ҳамкорликда талабаларнинг жисмоний тарбияси ва уларнинг соғлиқларини янада яхшилаш бўйича тадбирлар ишлаб чиқади;

- асосий буюртмачи ташкилот, корхона ва муассасалар билан корпоратив ҳамкорликни ривожлантириш, моддий-техник базани мустаҳкамлаш ҳамда талабаларнинг малакавий амалиёти самарадорлигини ошириш масалаларини муҳокама қилади ва уларни яхшилаш бўйича тавсиялар ишлаб чиқади;

- хорижий мамлакатларнинг олий таълим муассасалари билан ҳамкорлик алоқаларини ўрнатиш бўйича қарорлар қабул қилади;

- таълим хизматлари билан шуғулланувчи кичик корхоналар, фирма ва курслар фаолияти ҳақида раҳбарларнинг ҳисоботларини эшитади ҳамда тегишли қарор қабул қилади;

- университет талабалари ва ходимларининг техника хавфсизлиги ва меҳнат муҳофазасини такомиллаштириш бўйича тадбирларни белгилайди.

III. Кенгаш фаолиятини ташкил этиш

6. Кенгаш ўз фаолиятини ҳар ўқув йили учун ишлаб чиқиладиган режага мувофиқ амалга оширади. Кенгаш режаси Кенгаш томонидан кўриб чиқилгандан сўнг университет ректори томонидан тасдиқланади.

7. Университетнинг ўқув, илмий-услугий, илмий-тадқиқот, маънавий-маърифий ва ташкилий ишларга доир барча масалалар бўйича Кенгаш қарорлари очик овоз бериш тартибида кўпчиликнинг овози билан қабул қилинади. Кенгаш мажлиси унинг таркибидаги аъзоларнинг 2/3 қисми иштирок этгандагина ҳақиқий ҳисобланади.

Профессор-ўқитувчилар таркиби лавозимларини эгаллаш ҳамда профессор ёки доцент илмий унвонларини бериш бўйича ўтказиладиган танловлар ва тақдимномалар юзасидан қарорлар ёпиқ овоз бериш йўли билан белгиланган тартибда қабул қилинади.

8. Кенгаш қарорлари университет ректори томонидан тасдиқланганидан сўнг кучга киради.

9. Кенгаш мажлиси баённома билан расмийлаштирилади. Баённомалар Кенгаш раиси ва илмий котиби томонидан имзоланади.

10. Кенгаш раиси мунтазам равишда Кенгаш қарорларининг бажарилиши бўйича текширувлар ташкил этади ва Кенгаш аъзоларига уларнинг натижалари ҳақида ахборот беради.